

الفاجومي

شاعر الساطرة الذي حبيته
وتابعه الذي كبيته!

- سرتعاهد على إخفائه رجاء النقاش وفؤاد قاعود.
- رساله من صلاح جاهين: أنا سعيد جداً بنجاحاتك.
- شاعر صعيدي: نجم أصله بيكتب شعر وحش.

obekikan.com

وابتدا القلب البريء الخمام يندهش.. ويضنيه البحث عن إجابات للأسئلة الصعبة
اللى بدأت تحاصره بإلحاح... إيه.. فيه إيه؟ الناس بتكذب بمتتهى البساطه ليه؟ كل
الناس خايفه من بعضها.. خايفين على إيه؟ والمدهش فى الأمر إن اللى إنت خايف
منه.. هو نفسه خايف من شخص تانى.. والشخص التانى خايف من شخص تالت..
وهكذا...

مين اللى مخوف الناس دى كلها؟ أكيد شخص قوى جداً ومايبخافش... طب
تعالى كده نطلعها سلمه سلمه ابتداء من المواطن اللى خايف م المخبر اللى يبخاف م
الظابط اللى خايف م المأمور.. حنوصل لأكبر كرسى فى القعه!

أنا لما كلمت رجاء النقاش بخصوص ضروره تواجد فؤاد قاعود معانا ما
اعترضش وطلب منى أجيب فؤاد معايا ونقابله الصبح فى مكتبه بدار الهلال... وقد
كان واستقبلنا الراجل بترحاب وشربنا القهوه عنده وبعدين قال لى:

- سيينا لوحدنا شويه.

فأنا قلت لفؤاد:

- أنا منتظرك فى الغوريه.

وخرجت فرحان ورحت بشرت الشيخ إمام بعوده لم الشمل زى زمان فقوجئت
بعدم حماسه قلت له:

- إنت مش فرحان ليه؟

قال لى:

- يا أخى بطل الهبل دا بقى.. بقى بعد اللى اتعمل فيك دا كله.. حترجع تانى
لعنّب ديبه..

- قلت له:

- يا سيدى أنا مسامح.

قال لى:

- بس أنا مش مسامح.

قلت له:

- فى إيه؟

قال لى:

- فى العشره جتبه اللى سرقوها منى فى القطر.

ضحكت وقلت له:

- بقى أنا بأقولك حاول تتصور منظرنا واحنا كتيرع المسرح تقوللى قطر وترماى..

قال لى:

- لا معلش وإذا كنت بتحبني بلاش الموضوع ده.

قلت له:

- طب وحسن الموجى؟

قال لى:

- حسن الموجى بييجى بس ما يتفلسفش على.

وقررت إنى أتفاهم مع فؤاد ونتفق على حل للموضوع ده لكن فؤاد ما جاش..
اختفى تانى.. إيه اللى دار بينه وبين رجاء النقاش؟ الله أعلم!!

عموماً لتنين على قيد الحياه ربنا يطول عمرهم.. يمكن ييجى يوم ويقولوا.. قول يارب..

وصلتنى رساله من صلاح جاهين بيقول فيها أنا سعيد جداً بنجاحاتك وبيقول فى نهايتها أتعشم أن تزورنى فى منزلى المتواضع بالزمالك!

الرسالة دى جابها لى جمال الموجى ما أعرش إزاي واختفت ما أعرش إزاي

برضه!



إبراهيم النجار

أنا عمري ما باحتفظ بحاجه لكن الرساله دى بالذات كنت عايز أحتفظ بيها لأن صلاح جاهين بينى وبينه حاجه مش مفهومه. مش مجرد حب.. طب ما أنا باحب الدكتور حسين فوزى ومره أهدانى كتابه العظيم - سندباد المصرى - وكتب لى "إلى شاعرنا القومى من تعجب بلا تحفظات" وياحب يوسف إدريس بلدياتى ابن الشرقيه العبقرى ومره أهدانى واحد من كتبه وكتب لى "إلى الفارس الذى تمنيت أن أكونه" والكتابين دول بالإهدائين اللى عليهم ضاعوا.. زى أى شيء عندى ممكن يضيع.. أيوه زعلت عليهم شويه لكن خلاص... أدى الله وأدى حكمته.. إلا رساله صلاح جاهين زعلان عليها إلى وقتنا هذا.. ماتعرفش إيه اللى بينى وبين الراجل ده.. إحنا مش كنا على خلاف وبس.. لا دانا دمي فى رقبته لأنه هو كان فى السلطه وأنا معتقل بتهمه تأليف الشعر ومافتحش بقة.. لكن باحبه والمثل بيقول حبيك ييلع لك الزلط.. وأنا بصراحه مش عارف باحب فيه إيه؟ شاعر.. طب ما الشعرا ماليين الأرض.. فيه واد شاعر المفروض إنه صعيدي لأن الصعايده جدعان بس دا مش جدع.. الواد ده فى أسبوع ما اعتقلونى سنه ١٩٦٩ طالع مع السفاح شعراوى جمعه فى التلفزيون ردأ على الحمله الإعلاميه المثاره فى الصحافه العربيه والأوربيه بتندد باعتقالى وتطالب بالإفراج عنى شعراوى يقول له:

- آل إحنا بنعتقل الشعراء؟

فيرد هو:

- كيف يافندم؟ طب ما أنا جاعد مع سيادتك أهه وطالعين فى التلفزيون سوا.

فيقول له مثلاً:

- وإيه آخر إبداعاتك يا..

فيقول له:

- حصيده لاذعه يا فندم بافضح فيها جشع أصحاب المخابر وبتوع الدجيح.

يقول له:

- شفت الديمقراطية؟

يقول له:

- شفت يا فندم.

يقول له:

- قول لهم بقى..

يروح قايل لهم!!

وهو كان صديق لصديقى وزميل اعتقالى أحمد الخميسى ولما خرج أحمد وسابنى فى المعتقل قابل الواد ده وقال له من بال العتب:

- أنت بتهاجم نجم ليه وهو فى المعتقل؟

قال له:

- أصله بيكتب شعر وحش..

قال له:

- يعنى أفهم من كده إن الحكومه حابساه عشان شعره وحش؟

.. وغيره وغيره.. فؤاد حداد ما هو أشعر من نار على علم.. أحبه وأحترمه وأثامى فيه وأقول لشعراء الفصحى بالفم المليان:

- إنتو عندكم المتنبى ومحمود دوريش وإحنا عندنا فؤاد حداد.

فيه بعد كده حب؟ لكن صلاح جاهين كان مريبى لى خبل فى دماغى وجايب لى بعيد عنك مرض الانفصام الشخصى.. كنا بنبقى فى المعتقل وأهاجم كل شعراء السلطه وأجى عنده.. ما أقدرش! آخر مره رجع فيها من أمريكا بعد جراحه ناجحه فى الشريان التاجى وبعد ما قرينا الخبر فى "الأهرام" قال واحد من الطلبة المعتقلين:

- هو مش عايز يموت ليه؟

الكلمه وجعتنى .. بصيت له وقمت ..

دخلت زنزانتي وكتبت:

حمد الله ع السلامه

وسلامتك يا جميل

يا ريته كان فى قلبى

شريانك العليل

نفسى أكتب لك قصيده

زيك

مالهاش مثيل ..

.....

بعد ما كتبت القصيده ندهت على الطالب صاحب الكلمه اللى وجعتنى وقربتها
له .. فوجئت بدموعه نازله وراح واخذنى بالحضن وقال لى:
- أنا آسف يا ابو النجوم ..

